

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
KANTONALNI SUD U SARAJEVU
Broj:009-0-Su-15-000114
Sarajevo, 23.01.2015.godine**

Na osnovu tačke 10.2. Smjernica za objavljivanje tužilačkih i sudskih odluka na službenim web stranicama i člana 31. Zakona o sudovima u Federaciji Bosne i Hercegovine („Službene novine F BiH“ broj 38/05, 22/06, 63/10, 72/10 i 7/13), predsjednik Kantonalnog suda u Sarajevu donosi:

PRAVILNIK
kojim se reguliše procedura vršenja obrade sudskih akata na Internetu

Član 1.

- (1) Na web stranici Suda objavljuju se presude/odluke Suda, saopćenja za javnost i drugi informativni sadržaji o konkretnim krivičnim postupcima.
- (2) Pod sudskim odlukama smatraju se: odluke o prijedlozima za određivanje pritvora, presude i rješenja.
- (3) Na Internet stranici Suda objavljuju se cjelovite sudske odluke, koje su postale pravosnažne ili samo izreka pravosnažne presude bez obrazloženja.
- (4) Predsjednik suda, postupajući sudija ili predsjednik vijeća će pravosnažne odluke koje namjeravaju objaviti na web stranici suda, elektronskom poštom ili na drugi adekvatan način dostaviti stručnom saradniku za IKT komunikacije, koji je nadležan za objavljivanje istih na web stranici.

Član 2.

(Objava presuda u krivičnim predmetima)

- (1) Presude/odluke Suda su javne.
- (2) Na web stranici Suda objavljuju se presude/odluke od interesa za javnost i presude/odluke od značaja za pravnu praksu, u skladu sa resursima i kapacitetima Suda.
- (3) Presude/odluke od interesa za javnost su one koje su donesene u predmetima ratnih zločina i drugih krivičnih djela protiv međunarodnog prava koja ne zastarjevaju,

organizovanog kriminala, korupcije, krivična djela protiv službene dužnosti, privredni kriminal, krivična djela za koja se može izreći kazna dugotrajnog zatvora ili zatvora u trajanju od 10 (deset) godina, te odluke u drugim predmetima gdje se utvrdi "poseban javni interes".

(4) "Posebni javni interes" u kontekstu Smjernica VSTV-a za objavljivanje tužilačkih i sudskih odluka na službenim web stranicama, utvrđivat će se primjenom nekog od slijedećih kriterija:

- a) težina krivičnog djela (npr. ratni zločini i dr. krivična djela koja ne zastarijevaju, organizirani kriminal, privredni kriminal, korupcija, krivična djela za koja se može izreći kazna zatvora u trajanju od 10 godina ili kazna dugotrajnog zatvora...);
- b) karakter i karakteristike učesnika u postupku (npr. javni službenici, imenovani ili izabrani dužnosnici u izvršnoj, zakonodavnoj ili sudskoj vlasti...);
- c) ostali opravdani interesi javnosti (npr. opasnost djela za društvo, pojavni oblik kriminaliteta i sl.)

(5) U cilju ujednačavanja sudske prakse Sud će na web stranici suda objavljivati i presude/odluke od značaja za pravnu praksu, koje će se objavljivati u bazi sudskih odluka Centra za sudsku dokumentaciju VSTV-a.

(6) Presudama/odlukama od značaja za pravnu praksu smatraju se one koje prema ocjeni Suda mogu biti od interesa za stručnu zajednicu, odnosno za praćenje razvoja sudske prakse Suda u okviru njegove nadležnosti u krivičnim, upravnim i građanskim stvarima.

(7) U svim sudskim odlukama/ presudama, objavljenim na web stranici Suda, ne objavljuju se sljedeći lični podaci:

- jedinstveni matični broj - JMBG,
- broj lične karte, pasoša, vozačke dozvole i brojevi ostalih ličnih dokumenata,
- posebne kategorije podataka propisane u članu 3. Zakona o zaštiti ličnih podataka, odnosno svi lični podaci koji otkrivaju: a) rasno porijeklo, državljanstvo, nacionalno ili etničko porijeklo, političko mišljenje ili stranačku pripadnost, članstvo u sindikatima, religijsko, filozofsko ili drugo uvjerenje, zdravstveno stanje, genetski kod, seksualni život; b) krivične presude, c) biometrijske podatke.

Izuzetno, takvi podaci se mogu objaviti ukoliko predstavljaju bitno obilježje bića krivičnog djela.

(9) U cilju zaštite ličnog ili intimnog života osoba optuženog ili oštećenog, tužitelja ili tuženog, ili zaštite interesa maloljetnika ili svjedoka, Sud će po službenoj dužnosti ili po prijedlogu stranaka ili branioca, a imajući u vidu odredbe Zakona o krivičnom postupku FBiH, Zakona o upravnom postupku FBiH i Zakona o parničnom postupku FBiH, odlučiti da se u sudskoj odluci objavljenoj na web stranici Suda, a naročito u predmetima

iz stava 3. pored podataka iz stava 7. ovog člana, ne objave ni sljedeći lični podaci optuženog, tužitelja, tuženog, oštećenog ili svjedoka:

- ime i prezime, nadimak (kod ženskih osoba i djevojačko prezime),
- datum i mjesto rođenja,
- ime i prezime roditelja,
- adresa
- e mail adresa, URL/web adresa.

(10) U slučaju iz predhodnog stava, takvi podaci bit će anonimizirani.

Član 3.

(Objava presuda u građanskim predmetima)

(1) Presude u građanskim predmetima se u principu neće objavljivati na web stranici Suda.

(2) Presude u bračnim i porodičnim sporovima ni u kom slučaju neće se objavljivati na web stranici Suda.

(3) U slučaju da se presude iz stava 1. ovog člana objavljuju na web stranici Suda, objavljivanje će se činiti u skladu sa procjenom javnog interesa.

(4) Pri procjeni javnog interesa, mogu se uzeti u obzir sljedeći faktori:

a) karakter i karakteristike predmeta i učesnika u postupku (npr. slučajevi privatizacije, kada su stranke – tužilac i/ili tuženi – država, privredna društva u državnoj svojini i sl.)

b) ostali opravdani interesi javnosti, koje u konkretnom slučaju procjenjuje predsjednik Suda.

(5) U građanskim presudama koje se objavljuju na web stranici Suda gdje god je to nužno zaštitit će se (anonimizirati) lični podaci osoba koje se u njima navode.

Član 4.

(Koordinacija objavljivanja sudskih odluka)

Uz objavljenu sudsku odluku, gdje god je to moguće, navest će se i link na prvostepenu presudu, odnosno s njom povezane odluke višeg suda po žalbi.

Član 5.
(Informacije o žalbama)

O svim žalbama i izjašnjenjima na žalbe podnesenim u toku postupka, može se objaviti saopštenje ili drugi informativni sadržaj, koji će sadržavati informaciju o tome da li je i kada podnesena žalba, na koju odluku i kojem sudu.

Član 6.
(Vrijeme trajanja objave odluke)

(1) Sud će pravosnažnu odluku ukloniti sa interneta nakon isteka roka od 3 (tri) godine od dana objavljivanja presude.

(2) Sudske odluke koje su predhodile pravosnažnoj presudi, bit će uklonjene sa interneta po isteku vremena predviđenog za objavu pravosnažne presude.

(3) Sudske odluke u predmetima vezanim za krivična djela protiv čovječnosti i vrijednosti zaštićenih međunarodnim pravom neće se uklanjati sa internet stranice Suda.

Član 7.
(Način zamjene ili ispuštanja ličnih podataka)

Kada je to propisano ovim Pravilnikom, lični podaci se zamjenjuju ili ispuštaju na način koji je detaljnije propisan Uputama o načinu anonimizacije saopštenja za javnost i presuda/odluka, koje donosi predsjednik Suda.

Član 8.
(Stupanje na snagu)

Ovaj Pravilnik stupa na snagu danom donošenja.



Predsjednik suda

Jasmin Jahjaefendić